

Na osnovu čl. 11. i 12. Zakona o Komisiji za vrijednosne papire („Službene novine Federacije BiH“, br. 39/98., 36/99 i 33/04) i čl. 166. st. (3), čl. 178. st. (2), čl. 209., čl. 231. st. (2), čl. 237., čl. 239. st. (1), 240. st. (2), čl. 241. st. (2) i (5), čl. 243. st. (1) tč. e) i st. (2), čl. 244. st. (4), čl. 245., čl. 246. i 247. Zakona o tržištu vrijednosnih papira („Službene novine Federacije BiH“, br. 85/08 i 109/12), Komisija za vrijednosne papire Federacije BiH (u daljem tekstu: Komisija), na 366. sjednici održanoj dana 18.04.2013.godine, donijela je

**P R A V I L N I K
O OBJAVLJIVANJU INFORMACIJA I IZVJEŠTAVANJU NA TRŽIŠTU
VRIJEDNOSNIH PAPIRA**

I OPĆE ODREDBE

Član 1.

(1) Ovim Pravilnikom bliže se propisuje sadržaj, način i rokovi dostavljanja izvještaja, objavljivanja izvještaja i informacija emitenta, ovlaštenih učesnika na tržištu vrijednosnih papira, berze odnosno drugog uređenog javnog tržišta, Registra vrijednosnih papira u Federaciji BiH i samoregularajuće organizacije kao i sadržaj obavještenja o transakcijama na osnovu povlaštenih informacija.

(2) Objavljivanje informacija i izvještavanje društva za upravljanje fondovima i investicijskog fonda uređuje se posebnim propisom.

Član 2.

Izrazi koji se koriste u Pravilniku o objavljivanju informacija i izvještavanju na tržištu vrijednosnih papira (u daljem tekstu: Pravilnik) imaju sljedeće značenje:

- a) Emitent je društvo u smislu Zakona o tržištu vrijednosnih papira (u daljem tekstu: ZTVP),
- b) Emitent otvoreno dioničko društvo je društvo definisano čl. 179. ZTVP i čl. 107. Zakona o privrednim društvima (u daljem tekstu: ZPD),
- c) Emitent koji nije otvoreno dioničko društvo je društvo koje ne ispunjava uslove iz tč. b) ovoga člana i/ili društvo koje emitira vrijednosne papire, a nije oblika „dioničko društvo“,
- d) Ovlašteni učesnik u smislu ovoga Pravilnika je profesionalni posrednik i banka koja obavlja poslove iz čl. 67. ZTVP,
- e) Berza odnosno drugo uređeno javno tržište, Registar vrijednosnih papira u Federaciji BiH (u daljem tekstu: Registar) su učesnici na tržištu u smislu ZTVP,
- f) Elektronski dokument je izvještaj i informacija elektronski oblikovana, poslana, primljena ili sačuvana na elektronskom, magnetnom, optičkom ili drugom mediju.

II IZVJEŠTAVANJE I OBJAVLJIVANJE INFORMACIJA EMITENATA

Član 3

Emitenti otvorena dionička društva su obavezna objavljivati i dostavljati polugodišnje i godišnje izvještaje o poslovanju, izvještaj vanjskog revizora i izvještaj o događajima koji bitno utiču na finansijsko poslovanje emitenta na način i u rokovima propisanim ZTVP, ZGD i ovim Pravilnikom.

Član 4.

(1) Emitent otvoreno dioničko društvo vrši objavljivanje polugodišnjeg i godišnjeg izvještaja o poslovanju i izvještaja vanjskog revizora na svojoj web stranici i dostavlja ih berzi radi objavljivanja na web stranici berze.

(2) Emitent otvoreno dioničko društvo vrši objavljivanje izvještaja o događajima koji bitno utiču na finansijsko poslovanje emitenta na način iz st. (1) ovoga čl. i u roku iz ZTVP i ZGD.

Član 5.

Emitent koji nije otvoreno dioničko društvo dužan je vršiti objavljivanje polugodišnjeg i godišnjeg izvještaja o poslovanju i izvještaja o događajima koji bitno utiču na finansijsko poslovanje emitenta na svojoj web stranici, a ako nema web stranicu, dužan je izvršiti dostavljanje berzi radi objavljivanja na web stranici berze ili izvršiti objavljivanje u dnevnim novinama koje izlaze na području Federacije BiH.

Član 6.

(1) Emitenti čiji su vrijednosni papiri uvršteni u kotaciju na berzi su dužni, pored polugodišnjeg i godišnjeg izvještaja o poslovanju, izvještaja vanjskog revizora i izvještaja o događajima koji bitno utiču na finansijsko poslovanje emitenta, sačinjavati i objavljivati i tromjesečne/devetomjesečne izvještaje o poslovanju.

(2) Emitent čiji su vrijednosni papiri uvršteni u kotaciju na berzi vrši objavljivanje izvještaja iz st. 1. ovog čl. na svojoj web stranici i dostavlja ih berzi radi objavljivanja na web stranici berze.

(3) Emitenti koji nisu otvorena društva a čiji su vrijednosni papiri uvršteni u trgovanje na berzi, dužni su polugodišnje i godišnje izvještaje o poslovanju, izvještaje vanjskog revizora i izvještaje o događajima koji bitno utiču na finansijsko poslovanje emitenta dostavljati berzi radi objavljivanja na web stranici berze.

Članak 7.

(1) Polugodišnji i godišnji izvještaj o poslovanju, izvještaj vanjskog revizora i izvještaj o događajima koji bitno utiču na finansijsko poslovanje, emitenti dostavljaju Komisiji putem e-maila na adresu info@komvp.gov.ba, dostavljanjem linka (poveznice) na svoju web stranicu, na web adresu na kojoj je postavljen izvještaj.

(2) Dostavljanjem linka (poveznice) iz st. (1) ovoga čl. smatra se da je ispunjena obaveza dostavljanja izvještaja Komisiji.

(3) Emitenti koji nisu otvorena dionička društva i koji nemaju web stranicu i čiji izvještaji se objavljuju na web stranici berze, dostavljaju Komisiji potvrdu berze o prijemu izvještaja radi objave.

(4) Emitenti koji nisu otvorena dionička društva i koji nisu uvršteni u trgovanje na berzi a koji vrše objavu izvještaja iz čl. 8. st. (5) ovoga Pravilnika u dnevnim novinama, dostavljaju Komisiji kopiju objavljenog izvještaja u dnevnim novinama.

(5) Nedostavljanje dokaza i/ili dostavljanje na način koji nije saglasan ovom Pravilniku smatrat će se kao da objavljivanje nije izvršeno.

Član 8.

(1) Godišnji, polugodišnji i tromjesečni/devetomjesečni izvještaj o poslovanju se sačinjava, objavljuje i dostavlja na obrascima u Excel formatu, koji su dostupni na web stranici Komisije.

(2) Cjelovit izvještaj vanjskog revizora i izvještaj o događaju koji bitno utiče na finansijsko poslovanje se objavljuje u PDF formatu.

(3) Obrasci za elektronsko izvještavanje dostupni su u sjedištu i na web stranici Komisije (www.komvp.gov.ba).

(4) Emitenti privredna društva dostavljaju izvještaje na obrascima OEI-PD, banke na obrascima OEI-BA a osiguravajuća društva na obrascima OEI-OS.

(5) Emitenti koji nisu otvorena dionička društva i čiji vrijednosni papiri nisu uvršteni u trgovanje na berzi i koji objavu izvještaja vrše u dnevnim novinama, godišnje i polugodišnje izvještaje objavljuju u formi Skraćenog izvještaja.

(6) Obrazac Skraćenog izvještaja je dostupan na web stranici Komisiji.

Član 9.

- (1) Izvještaji iz ovoga Pravilnika se dostavljaju u rokovima, i to:
- a) Godišnji izvještaj o poslovanju, koje će biti dostavljen skupštini emitenta na usvajanje i u kome će biti navedeno da se radi o izvještaju koji će biti dostavljen na usvajanje, najkasnije do 30. aprila/travnja tekuće za prethodnu godinu;
 - b) Polugodišnji izvještaj o poslovanju najkasnije do 31. augusta/kolovoza tekuće godine;
 - c) Tromjesečni/devetomjesečni izvještaj o poslovanju, koje dostavljaju emitenti na kotaciji, u roku od 30 dana po završetku obračunskog perioda na koji se izvještaj odnosi.
 - d) Cjelovit izvještaj vanjskog revizora o obavljenoj reviziji godišnjeg izvještaja o poslovanju emitenta, do dana održavanja skupštine emitenta na kojoj će izvještaj biti razmatran, a najkasnije šest mjeseci od završetka poslovne godine;
 - e) Izvještaji o događajima koji bitno utiču na finansijsko poslovanje, u roku od 8 dana od dana događaja.

Član 10.

(1) U slučaju da skupština emitenta ne usvoji godišnji izvještaj o poslovanju koji uključuje i izvještaj vanjskog revizora emitent je dužan odluku skupštine o neusvajanju godišnjeg izvještaja o poslovanju objaviti na način propisan za objavljivanje godišnjeg izvještaja u roku od 8 dana od dana donošenja odluke.

(2) Po ponovnom usvajanju godišnjeg izvještaja o poslovanju emitent je dužan objaviti odluku o usvajanju godišnjeg izvještaja na način propisan za objavljivanje izvještaja o događaju koji bitno utiče na finansijsko poslovanje, u roku od 8 dana od dana donošenja odluke.

Član 11.

(1) Za tačnost podataka sadržanih u dostavljenom elektronskom dokumentu odgovoran je zakonski zastupnik emitenta koji dostavlja dokument.

(2) Dostavljeni elektronski dokument obavezno sadrži ime i prezime zakonskog zastupnika emitenta i/ili ime i prezime osobe koju ovlasti zakonski zastupnik za posredovanje u elektronskoj komunikaciji.

Član 12.

(1) Vrijeme dostavljanja dokumenta je vrijeme kada je dokument elektronski otposlao iz informacijskog sistema pošiljaoca ili vrijeme dostavljanja putem pošte ili neposrednom predajom.

(2) Vrijeme prijema dokumenta je vrijeme kada je dokument elektronski zaprimljen u informacijski sistem primaoca ili vrijeme prijema putem pošte ili neposrednim prijemom.

(3) U slučajevima kada se traži potvrda prijema elektronskog dokumenta, primalac mora potvrditi prijem najdalje narednog dana od dana prijema.

Član 13.

Elektronski dokument čuva se izvorno u informacijskom sistemu ili na medijima koji omogućavaju trajnost elektronskog dokumenta za utvrđeno vrijeme čuvanja, i čine elektronsku arhivu.

Član 14.

Emitent koji prema ovom Pravilniku vrši objavljivanja na svojoj web stranici, dužan je osigurati da objavljeni izvještaj bude dostupan najmanje pet godina od dana objavljivanja.

Član 15.

Nezavisno od odredbi ovog pravilnika, Komisija ima pravo tražiti, a subjekti imaju obavezu dostaviti, bilo koji elektronski dokument i u štampanom obliku.

III OBAVJEŠTAVANJE EMITENATA O TRANSAKCIJAMA NA OSNOVU POVLAŠTENIH INFORMACIJA

Član 16.

Emitent čijim vrijednosnim papirima je izvršena transakcija i profesionalni posrednik dužni su obavijestiti Komisiju bez odlaganja o svakoj transakciji na osnovu povlaštenih informacija, a najkasnije naredni dan od dana saznanja ili kada je prema okolnostima mogao imati saznanja o ovim zaključenim transakcijama.

Član 17.

(1) Obavjest Komisiji iz prethodnoga čl. ovog Pravilnika sadrži:

- a) razloge zbog kojih podnosilac obavjesti smatra da bi ova transakcija ili grupa transakcija mogla predstavljati transakciju iz člana 220. Zakona;
- b) ime, prezime i adresu za fizičku osobu odnosno firmu i sjedište za pravnu osobu ili bilo koju identifikaciju za osobu za čiji je račun obavljena transakcija, kao i za osobe uključene u transakciju;
- c) vrsta transakcije (na berzi ili drugom uređenom javnom tržištu ili izvan njega);
- d) datum i vrijeme transakcije;
- e) podatke o vrijednosnom papiru;
- f) obim transakcije (količina i cijena);
- g) sve druge podatke i dokumentaciju koji mogu biti od značaja za provjeru transakcije;

(2) Obavjest iz st. 1. ovog člana može se dostaviti u pisanoj formi, putem fax-a i elektronske pošte.

IV IZVJEŠTAVANJE I OBJAVLJIVANJE INFORMACIJA BERZE I DRUGOG UREĐENOG JAVNOG TRŽIŠTA

Član 18.

Berza ili drugo uređeno javno tržište vrši objavljivanje polugodišnjeg i godišnjeg izvještaja o poslovanju, izvještaja vanjskog revizora i izvještaja o događajima koji bitno utiču na finansijsko poslovanje na svojoj web stranici i dostavlja Komisiji u rokovima i sadržini iz ovoga Pravilnika predviđenim za otvorena društva.

Član 19.

(1) Berza ili drugo uređeno javno tržište dužno je na svojoj web stranici objavljivati sva izvještaje emitenata koji vrše dostavljanje po odredbama ovoga Pravilnika.

(3) Zaprmljeni dokument od emitenta berza objavljuje na svojoj web stranici i izdaje potvrdu o prijemu, narednoga dana od dana prijema.

(3) Berza ili drugo uređeno javno tržište dužno je sve objavljene dokumente održavati dostupnim na svojoj web stranici tokom sljedećih pet godina.

Član 20.

Berza ili drugo uređeno javno tržište dužno je na svojoj web stranici objavljivati i dostaviti na objavu u sredstvima javnog informisanja informacije o prometu vrijednosnim papirima koji se obavi na berzi ili drugom uređenom javnom tržištu u vidu kursnih lista vrijednosnih papira, a najkasnije do kraja radnog vremena na dan na koji se kursna lista odnosi.

Član 21.

Kursna lista vrijednosnih papira kojima se trguje na berzi ili drugom uređenom javnom tržištu sadrži sljedeće podatke za pojedini vrijednosni papir:

- a) simbol vrijednosnog papira;
- b) naziv emitenta vrijednosnog papira;
- c) oznaku sistema trgovanja koji se primjenjuje za vrijednosni papir;
- d) ponderisani prosječni kurs vrijednosnog papira za dan na koji se kursna lista odnosi;
- e) procenat promjene ponderisanog prosječnog kursa vrijednosnog papira u odnosu na prethodni dan u kojem se obavio promet tim vrijednosnim papirom;

- f) aukcijski kurs vrijednosnog papira, ukoliko se vrijednosnim papirom trguje aukcijskim sistemom, odnosno zaključni kurs vrijednosnog papira, ukoliko se vrijednosnim papirom trguje u kontinuiranom sistemu, za dan na koji se kursna lista odnosi;
- g) najvišu kupovnu cijenu vrijednosnog papira, uspostavljenu po osnovu naloga za kupnju primljenih nakon prethodno objavljene kursne liste;
- h) najnižu prodajnu cijenu vrijednosnog papira, uspostavljenu po osnovu naloga za kupnju primljenih nakon prethodno objavljene kursne liste;
- i) najviši i najniži kurs po kojem se obavio promet vrijednosnim papirom u periodu od šest mjeseci prije dana na koji se kursna lista odnosi;
- j) količinu vrijednosnog papira kojom se obavio promet u danu na koji se kursna lista odnosi;
- k) vrijednost prometa vrijednosnog papira koji se obavio u danu na koji se kursna lista odnosi.

Član 22.

Berza ili drugo uređeno javno tržište dužno je sve objavljene kursne liste stalno održavati dostupnim na svojoj web stranici na način koji omogućava njihovu neometanu upotrebu i štampanje.

Član 23.

Berza ili drugo uređeno javno tržište dužni su isti dan proslijediti profesionalnim posrednicima informacije o objavljenim tender ponudama za kupovinu vrijednosnih papira, kao i o svim događajima koji imaju uticaja na cijenu vrijednosnih papira.

Član 24.

(1) Berza ili drugo uređeno javno tržište dužni su sačiniti izvještaje o zaključenim transakcijama vrijednosnim papirima na vanberzovnom tržištu – OTC za svaki dan u kojem se obavio promet vrijednosnim papirima, a koji sadrže najmanje sljedeće podatke za svaku transakciju:

- a) datum i vrijeme izvršenja zaključene transakcije (prijenosa kod Registra);
- b) simbol vrijednosnih papira, količina, cijena i vrijednost transakcije;
- c) oznaku profesionalnog posrednika, kupca i prodavaoca u transakciji.

Član 25.

(1) Berza ili drugo uređeno javno tržište dužno je izvještaj o zaključenim transakcijama, bez naknade i do kraja radnog vremena, na dan koji se izvještaj odnosi, dostaviti profesionalnim posrednicima, bankama depozitarima profesionalnih posrednika/bankama skrbnicima i Registru, u elektronskom obliku.

(2) Izvještaj iz staka 1. ovog člana, koji se dostavljaju ovlaštenim učesnicima koji obavljaju poslove iz čl. 67. st. (1) tč. a) do g) ZTVP, sadrži pregled transakcija koje je zaključio taj ovlašteni učesnik.

(3) Izvještaj iz stava 1. ovog člana koje se dostavlja Registru sadrži i pregled svih transakcija koje su zaključene u danu na koji se izvještaj odnosi.

Član 26.

Berza ili drugo uređeno javno tržište dužno je Komisiji osigurati praćenje prometa vrijednosnih papira i prijavljenih izvanberzanskih transakcija, na način koji odredi Komisija.

Član 27.

Pored informacija i izvještaja koje dostavlja ili objavljuje u skladu sa odredbama ovog Pravilnika, berza ili drugo uređeno javno tržište može uz naknadu sačinjavati, dostavljati i objavljivati i druge informacije, izvještaje i analize vezane za promet vrijednosnih papira.

Član 28.

(1) Berza i drugo uređeno javno tržište dužni su Komisiju izvještavati i o sljedećem:

- a) prijemu ili isključenju iz članstva;

- b) prijemu ili isključenju vrijednosnih papira iz trgovanja;
 - c) svakoj obustavi prometa;
 - d) izmjeni rasporeda trgovanja, sa obrazloženjem o razlozima izmjene rasporeda trgovanja;
 - e) izmjeni satnice trgovanja, odnosno zaustavljanju trgovanja pojedinim vrijednosnim papirom;
 - f) nepravilnosti u radu berzanskog sistema trgovanja sa objašnjenjem razloga;
 - g) svakoj povredi propisa i općih akata u trgovini i izrečenoj mjeri članu berze odnosno drugog uređenog javnog tržišta;
 - h) svakom raskidu pravnog posla i transakciji koja se nije mogla izvršiti;
 - i) svakom sporu i ishodu spora u kojem je berza ili drugo uređeno javno tržište stranka a ne radi se o potraživanjima po osnovu njenih neizmirenih obaveza;
 - j) svakoj izrečenoj mjeri berzi ili drugom uređenom javnom tržišta od strane nadležnog organa.
- (2) Izvještaj iz stava 1. tč. a), b), c), g), h) i) i j) ovog člana dostavlja se Komisiji naredni dan od dana nastanka događaja, a izvještaj pod d), e) i f) odmah po nastanku događaja.
- (3) Berza i drugo uređeno javno tržište dužni su dostaviti Komisiji i bilo koji drugi podatak koji ona zatraži u vršenju svojih nadležnosti, u roku i na način koji odredi, a isto tako po nalogu Komisije dužni su i javno objaviti neki od podataka navedenih u stavu 1. ovog člana.

Član 29.

- (1) Berza je obavezna obavijestiti Komisiju o provedenim berzanskim nadzorima, slučajevima kršenja odredaba zakona, pravila i drugih akata berze, nepravilnostima u poslovanju s vrijednosnim papirima od strane članova berze i brokera, pokrenutim postupcima prema prekršiocima, preduzetim mjerama protiv prekršilaca, te podacima o nezakonitostima u koje su upletene fizičke ili pravne osobe koji nisu članovi berze ili brokeri.
- (2) Podatke iz stava 1. ovog člana berza dostavlja Komisiji do 5. u mjesecu za prethodni mjesec.

V IZVJEŠTAVANJE I OBJAVLJIVANJE INFORMACIJA REGISTRA VRIJEDNOSNIH PAPIRA

Član 30.

Registar je dužan da vrši objavljivanje polugodišnjeg i godišnjeg izvještaja o poslovanju, mišljenja vanjskog revizora i izvještaja o događajima koji bitno utiču na finansijsko poslovanje, na svojoj web stranici i dostavlja ih Komisiji u rokovima i sadržini iz ovoga Pravilnika, predviđenim za otvorena dionička društva.

Član 31.

- (1) Pored izvještaja propisanih ZTVP i drugim općim aktima Komisije, Registar je dužan dostavljati Komisiji i izvještaje o sljedećem:
- a) prijemu odnosno isključenju iz članstva ili bilo kojoj drugoj mjeri izrečenoj članovima Registra;
 - b) upisu emitiranih vrijednosnih papira i brisanju vrijednosnih papira;
 - c) prijenosima koji se vrše između zbirnih skrbničkih računa;
 - d) promjenama u iznosu vlasništva (procenti) iz čl. 248. ZTVP.
 - e) svim prijenosima vrijednosnih papira (po svim osnovima za prijenos) i promjenama statusa vrijednosnih papira uključujući i prijenose na osnovu pravnih poslova, sudskih odluka i odluka nadležnih organa;
 - f) o upisima i brisanju prava trećih osoba na vrijednosnim papirima kao i upisima i brisanju zabrane prava raspolaganja na osnovu ugovora, sudskih odluka i odluka nadležnih organa,
 - g) svakom sporu i ishodu spora u kojem je Registar bio stranka a ne radi se o sporovima iz osnova potraživanja Registra zbog neplaćanja Registru,
 - h) svakoj izrečenoj mjeri Registru od strane nadležnog organa;

- i) o vlasničkoj strukturi (prvih 20 vlasnika) zatvorenih investicijskih fondova na datume 01. i 15. u mjesecu
- (2) Izvještaj iz st. 1. tč. a), b), c) i i) ovog čl. Registar je dužan dostaviti Komisiji najkasnije u roku od 3 dana od dana nastanka događaja na koji se odnosi izvještaj, a izvještaj iz st. 1. tč. f), g) i h) ovog čl. najkasnije do 5. tekućeg mjeseca za prethodni mjesec.
- (3) Izvještaj iz st. 1. tč. d) i e) ovog čl. Registar dostavlja Komisiji elektronskom porukom narednog dana od dana nastale promjene, a u pisanom obliku najkasnije do 5. tekućeg mjeseca za prethodni mjesec.

Član 32.

- (1) Registar je obavezan izvještavati na svojoj web stranici javnost o najvećim dioničarima emitenata (prvih deset dioničara), odnosno obavezan je objaviti podatke o dioničarima koji imaju više od 5 % vlasništva u pojedinom emitentu i listu otvorenih dioničkih društava.
- (2) Registar je dužan berzi dostavljati izvještaje o izvršenim izvanberzovnim prijenosima iz čl. 24. st. (1) ovoga Pravilnika.
- (3) Registar je dužan učiniti dostupnim javnosti sve informacije za koje je to određeno Zakonom, općim aktima Komisije i aktima Registra.

VI IZVJEŠTAVANJE I OBJAVLJIVANJE INFORMACIJA OVLAŠTENIH UČESNIKA

Član 33.

- (1) Profesionalni posrednik vrši objavljivanje polugodišnjeg i godišnjeg izvještaja o poslovanju i izvještaja vanjskog revizora na svojoj web stranici i dostavlja Komisiji u roku od 30 dana od dana proteka roka za pripremu tih izvještaja, u sadržini iz ovoga Pravilnika.
- (2) Komisija će izvještaje zaprimljene u elektronskom obliku objaviti na svojoj web stranici.

Član 34.

- (1) Profesionalni posrednik izvještaje iz čl. 243. st. (1) tč. b) ZTVP objavljuje na svojoj web stranici i dostavlja berzi radi objave, u roku od 8 dana od dana događaja.
- (2) Po prijemu izvještaja iz st. (1) ovoga čl. berza je dužna izdati potvrdu i objaviti izvještaja na svojoj web stranici
- (3) Dostavljanje dokaza Komisiji o izvršenoj objavi, profesionalni posrednik vrši u istom roku (st. 1. ovoga čl.), dostavljanjem linka (poveznice) na svoju web stranicu na kojoj je objavljen izvještaj i potvrde berze o prijemu izvještaja radi objave.

Član 35.

- (1) Ovlašteni učesnik koji obavlja poslove s vrijednosnim papirima je dužan sačinjavati i dostavljati Komisiji Poseban godišnji i polugodišnji izvještaj o poslovanju na obrascima koji su dostupni na web stranici Komisije.
- (2) Posebni izvještaji o poslovanju se dostavljaju Komisiji u pisanoj formi i elektronskom poštom, i to:
- do 31.03. tekuće za prethodnu godinu (godišnji izvještaj), i
 - do 31.07. tekuće godine (polugodišnji izvještaj).

Član 36.

- (1) Pored izvještaja propisanih Zakonom, ovim Pravilnikom i drugim općim aktima Komisije, profesionalni posrednik je dužan dostavljati Komisiji i izvještaje o sljedećem:
- a) pokretanju likvidacije ili stečaja;
 - b) promjenama članova uprave i nadzornog odbora, kao i revizora;
 - c) svakoj skupštini dioničara/udjeljčara;
 - d) svakom sporu i ishodu spora u kojem je profesionalni posrednik bio stranka;
 - e) svakoj izrečenoj mjeri profesionalnom posredniku od strane nadležnog organa;

- f) ostalim događajima koji mogu uticati na poslovanje profesionalnog posrednika i njegov finansijski položaj.
- (2) Izvještaji iz st. (1) ovoga čl. se dostavljaju najkasnije u roku od 8 dana od dana nastanka događaja na koji se izvještaj odnosi.
- (3) Ovlašteni učesnik u obavljanju brokerskih poslova je dužan dostavljati Komisiji i izvještaje o realiziranim nalogima po osnovu skrbništva, do 5. tekućeg mjeseca za prethodni mjesec.
- (4) Profesionalni posrednik dostavlja sudsko rješenje kojim se vrši upis izmijenjenih podataka u sudskom registru, najdalje u roku od 15 dana od dana donošenja odluke suda o upisu promjene podataka.
- (5) Ovlašteni učesnik je dužan dostaviti Komisiji i bilo koji drugi podatak koji ona zatraži u vršenju svojih nadležnosti, u roku i na način koji odredi Komisija.
- (6) Ovlašteni učesnik je dužan objaviti i druge podatke koji mogu biti dostupni javnosti, ako Komisija naloži.
- (7) Izvještaj iz ovoga čl. Pravilnika dostavlja se Komisiji u pisanoj formi i elektronskom poštom.

Član 37.

Profesionalni posrednik dostavlja Komisiji obavjesti o transakcijama na osnovu povlaštenih informacija u skladu sa članom 16. i 17. ovog Pravilnika.

VII IZVJEŠTAVANJE I OBJAVLJIVANJE INFORMACIJA SAMOREGULIRAJUĆE ORGANIZACIJE

Član 38.

Samoregulirajuća organizacija je dužna dostavljati berzi radi objavljivanja podataka iz čl. 247. ZTVP i dostavljati Komisiji dokaz o izvršenoj dostavi berzi.

VIII PRIJELAZNE I ZAVRŠNE ODREDBE

Član 39.

U slučaju povreda odredaba ovoga Pravilnika Komisija može prema odgovornim osobama preduzeti mjere u skladu sa zakonom i prosima Komisije.

Član 40.

Obavjesti i informacije sačinjene po općim aktima Komisije koji su važili prije datuma primjene ovoga Pravilnika objavit će se i dostaviti Komisiji u skladu s tim općim aktima.

Član 41.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH" i primjenjivati će se od 01.07.2013. godine.
Danom primjene ovoga Pravilnika prestaje da važi Pravilnik o objavljivanju informacija i izvještavanju na tržištu vrijednosnih papira („Službene novine Federacije BiH", br. 37/09).

Predsjednik
Komisije za vrijednosne papire
Federacije Bosne i Hercegovine

mr Hasan Čelam

Broj: 01-02-874/13
Sarajevo, 18. aprila 2013.